

– Այո՛, եթե ունենա՛ր... – պատասխանեց վարպետը վրդոված ձայնով: – Բայց հայը երբ երկու դուրուշ ունի, միշտ մտածում է այդ բանի վրայ, թե ի՞նչ գնեմ ու ի՞նչ ծախեմ, որ երկուսը երեք դարձնեմ: Նա այլևս ուրիշ բանի վրայ չէ մտածում: Եւ կառավարութիւնը սովորել է նրան միշտ այդպէս տեսնել, եւ երբ նրա ձեռքում մի զէնք է նկատում, իսկոյն խլում է՝ ասելով, «այդ քո գործը չէ, դու գնայ քո արշինով պարապի՛ր»... Եւ հայը մտում է, որպէս մի անպաշտպան որս քրդի եւ տաճկի ձեռքում: Նրա հունձքի արտերը այրում են, նրա այգիները կտրատում են, եւ տերը կանգնած, ձեռքերը փակած, միայն բաց աչքերով նայում է ու ա՛խ քաշում...

– Միթե՛ այդ աստիճան անարդար է կառավարութիւնը, – հարցրի ես:

– Ին՛չ կառավարութիւն: Այստեղ կառավարութիւն չկայ, այստեղ կան միայն կեղեքիչ եւ ինքնակամ կառավարիչներ, որոնք միեւնոյն բարբաբոսութիւններն են գործ դնում: Լսեցէք, ես ձեզ կը պատմեմ մի փաստ, որից կարել է հասկանալ, թե ինչ պտուղներ են մեր կառավարիչները: Մեր քաղաքը վաղուց անտի զինոորանոց չուներ: Չինոորներին սովորաբար բաժանում էին շրջակայ գիւղերի հայոց տներում, եւ ամէն մի ընտանիք պարտաւոր էր մի բանի զինոորներ պահել: Կարող էք երեւակայել, թե ի՞նչ բան է անկարգ բաշիբոզուկը հայ ընտանիքի մէջ: Նա իրան կատարեալ տան տեր է համարում եւ թոյլ է տալիս ամէն տեսակ կամայականութիւն: Գիւղացիները, չկարողանալով համբերել, դիեցին նահանգապետ փաշային, խոստացան, թե իրանց ծախքով պատրաստ են քաղաքի մօտ մի զինոորանոց կառուցել, միայն թե ազատեն իրանց անկարգ հիւրերից: Փաշան ընդունեց: Հաւաքեցան, խորհեցին, հաշուեցին շէնքի ծախսերը, եւ բաժանելով իրանց մէջ, վճարեցին ամբողջ գումարը: Փողերի մեծ մասը դրա ու նրա կոկորդն անցաւ, եւ վերջը շէնքի բոլոր փայտեղէնները դարձեալ գիւղացիների այգիներից կտրեցին:

– Ձրի՞:

– Այո՛, ձրի: Եւ մեծ անգթութիւնը նրանումն էր, որ տապարը ծառի տիրոջ ձեռքը տալով եւ նրա գլխին ծեծելով, հէնց իրան՝ տիրոջն էին ստիպում կտրել իր սիրելի ծառը, որպէս դանակը հօր ձեռքը տալով՝ ստիպում են կտրել սիրելի որդու պարանոցը:

– Ապա ի՞նչ էին շինում ձեր քաղաքի սրբազան առաջնորդը եւ ձեր էֆենդի աղաները: Ինչո՞ւ ժողովրդի այդ պատուելի ներկայացուցիչները չբողոքեցին: